

Glimà, strichà e laschà temp per madürrar

Vernissascha dal nouv cudesch da Dumenic Andry

DAD ANNATINA FILLI / ANR

■ **L'autur e romanist Dumenic Andry ha preschantà seis nouv cudesch «Sablun». Dürant bundant 15 ons ha'l laschà madürrar quist'ouвра chi cumpiglia 78 poesias in vallader.** La Chasa Editura Rumantscha publichescha minch'on tanter ses ed ot cudeschs novs e da quels reedit. Il 50avel cudesch cha quista chasa editura ha publichà es gnü preschantà in gövgia saira i'l Globe dal Lyceum Alpinum a Zuoz: I's tratta dal cudesch da poesias «Sablun». 78 poesias da *Dumenic Andry* laschan scuvrir al lectur surpraisas e misteris chi laschan drivir ils ögls per robas chi paran banalas sco il sablun suot ils peis. Per sia lavur vi da quista nou'ouвра ha l'autur vallader survgnü ün sustegn finanziel da la Pro Helvetia. La vernissascha es gnüda moderada dad *Annetta Ganzoni* ed accumulagnada musicalmaing d'*Andri Steiner* cun sias clarinetas.

L'ambizun da dir in möd cuort

Dürant bundant 15 ons ha laschà Dumenic Andry madürrar sias poesias. «Eu n'ha glimà, strichà e laschà davent plets, impustüt pro mia prüma poesia», ha'l manzunà. Sco romanist cugnuschà'l la lingua eir d'ün oter punct da vista. Avant co cha sias poesias rivan in ün cudesch survegnan quellas avuonda temp per madürrar. El scriva, müda, corregia e lascha leger sias poesias ad amis e cuntshaints. «Ils rebombs da quels chi legian sco prüms mias poesias am dan lura adüna darcheu curaschi per cuntinuar cun quista lavur.» Plünavant ha l'autur ladin, chi scriva in vallader, l'ambizun da dir alch



Anita Capaul da la Chasa Editura Rumantscha (schn.), l'autur Dumenic Andry e la moderatura da la saira Annetta Ganzoni. FOTO A. FILLI

in ün möd cuort, da giovar e da fuormar bellas robas culs plets. «Scriver poesias es sco destillar il vin ad üna spirituosa.» La tscherna dal tittel dal cudesch nun ha'l, sco ch'el ha manzunà, fat consciantmaing. «Il sablun ha ün aspet chi m'algorda a mi'infanzia.»

Gugent al cunfin tanter sablun ed aua

Uschè vaiva'l d'uffant adüna la tendenza da masdar il sablun cun aua e da far ün

masdügl e da pastrügljar. «Sablun süt es üna roba fich antipatica e chi nu's lascha fuormar», ha declarà Andry. Eir *Clà Riatsch* tematisescha il sablun in seis epilog «Ün pèr prouvas da leger vers da Dumenic Andry», chi fuorma üna part dal cudesch «Sablun». Per *Riatsch* es il sablun «ün material tuot oter co nöbel ed exclusiv, sablun vaina dapertuot, süllas rivas da flüms e lais, i'l desert, sün mincha plazza da fabrica.» Andry svesa as trategna gugent al cunfin tanter il mar e

las rivas cun sablun e crappa. Ma eir staziuns da viafiers sun per el lös importants dal gir da la vita. Ün'otra basa per sias poesias fuorman seis sömmis: Üna da quistas poesias es nada d'ün ün sogiuorn a Barcelona. L'üna o l'otra poesia ha'l dedicà a differentas personas. «Quai sun pel solit personas chi'm stan d'estrusch, chi m'han accumulagnà o chi m'han dat cussagl e chi sustegnan a mai pro la lavur», ha dit Andry. Per el esa eir stat important da chattar seis löet in tuot

il grond e vast spectrum da poets, autuors, istorgias, raquints e poesias rumantschas. Plünavant ha'l, sco ch'el ha manzunà, dat fadia da na copchar il stil d'oters collegas scriptuors. «Tschertas poesias m'accumplagnan üna vita intera. Impustüt quellas cun las impreschiuns restantas da tscherts mumaints da m'infanzia», ha'l conclus sia prelecziun.

Il rumanist engiadinais

Dumenic Andry es nat a Turich e creschü sü a Ramosch. Davo la matura a la Scuola chantunala grischuna ha'l stübià romanistica a l'Università da Turich. Hoz viva Andry cun sia famiglia a Zuoz e lavura sco romanist liber. Daspö l'on 2014 es el redactor da las Annalas da la Societad Retorumanescha. I's ons 2001 fin 2016 ha'l fat diversas contribuziuns per l'emischiun «Impuls» dad RTR. El publichescha in periodics sco il Chalender Ladin ed antologias. Da l'on 2003 ha'l survgnü il Premi da promoziun dal chantun Grischun e dal 2009 il Premi Schiller. Dumenic Andry ha publichà «Roba da tschel muond», cumparü dal 2002 pro Artori Savognin, e da l'on 2008 «Uondas» pro Ediziuns Mevina Puorger a Turich. Plünavant ha'l rapreschantà il chantun Grischun per la «Racolta da la poesia svizra 2013», edi pro «Alla chara fonte» a Lugano Viganello. L'autur engiadinais scriva lirica e prosa in vallader.

16avla Traversada da Sent

Cla Rauch ed üna da sias paschiuns

DAD ANNATINA FILLI / ANR

■ **102 participantas e participants s'han instradats in sonda a bunura bod da Fenga vers la Chamonna Sesvenna. Per la 16avla vouta s'haja traversà il territori da Sent dal nord vers süd, e da la partida d'eira eir Cla Rauch da Sent.** Adüna la prüma sonda dal mais lügl d'ün on dispèr piglian passa 100 persunas ils 34,5 kilometers tanter la Chamonna Fenga fin pro la Chamonna Sesvenna suot ils peis. Fingia per la 16avla vouta ha gnü lö in sonda la Traversada da Sent. L'oriund intent d'eira eir ingon amo adüna listess sco avant 30 ons: Spordscher üna spassegiada a travers il territori da Sent, e quai sainza squitsch da temp. Ils plü svelts rivan davo s-chars quatter uras al böt. Ma la gronda part dals participants piglia plü pachific e riva vers saira illa Chamonna Sesvenna, situada i'l Vnuost e pac toc davent dal cunfin svizzer.

Cumanzà vaiva tuot da l'on 1987: Insembel cun 87 otras persunas han tra-

versà ils ses iniziants in ün di il territori da Sent. La gruppa d'iniziants cun *Peder Buchli*, *Cla Rauch*, *Steivan Zanetti*, *Georg Buchli*, *Christian Juon* ed *Andri Gritti* han gnü l'idea d'organisar quist'occurrnza sportiva ün pa speciala e particulara. La fracziun da Sent, chi tocca uossa pro'l cumün politic da Scuol, cunfina vers nord cun l'Austria e vers süd cul Vnuost in Italia. La lingia d'ajer tanter quists duos cunfins importa 23,5 kilometers. «La lunghezza dal trajet da chaminar es 34,5 kilometers e schi's piglia pro la differenza d'otezza da 1670 meters dà quai üna distanza da prestaziun da var 50 kilometers», declera Cla Rauch chi'd es amo adüna commember dal comitè d'organisaziun da la Traversada da Sent. Quist on as vaivan s'annunzchats 114 duonnas, homens, giuvs ed attempats da Sent e d'utrò. «Il limit es vairamaing pro 100 persunas, quai pervi chi'd es lö be per tantas persunas illa Chamonna Sesvenna», declera'l. Ma fin uossa s'haja adüna darcheu chattà l'üna o l'otra soluziun per cha

tuots hajan pudü as partecipar a quist evenimaint.

I vain chaminà da minch'ora


Cla Rauch svesa ha traversà fingia 15 voutas il territori da Sent. «Ün on nu m'haja pudü partecipar perquai ch'eu vaiva ün problem cun ün pèr, manzunà'l. La Traversada da Sent ha lö pro minch'ora. Quellas pacas voutas chi ha plovü e cha l'ora d'eira pac amiaivla d'eiran be pacas persunas chi nu sun rivadas al böt. Eir accidaints plü gronds nu n'haja amo mai dat. Rauch quinta da la buna cumpagnia e da collegialità d'ün di. Uschè spetta als participants a Chavriz Grond, ün toc davo Zuort, üna gronda surpraisa. «Minch'on maldüseschan *Ernest* e *Jon Domenic Vital* cun lur duonnas a nus participants e quai cun grassins, lindornas, tuortas, cun café, tè ed oter da baiver.» Tenor el es quai ün rinforz fich bainvis, perche cha'l trajet fin a Sur En, il punct il plü bass da la Traversada, es amo lung e stantus. Pro'ls posts da con-

trolla a Zuort, Sur En ed Uina Dadaint han ils participants l'oblig da notar il temp d'arriv e quel da partenza. «Là s'haja eir la pussibilità da's custodir. In quist möd nun ha mincha singul da tour uschè blier bagagl cun sai.» Tut part a tuot las Traversadas da Sent han Georg Buchli, *Annatina* ed *Armon Nuotclà* e: «Bers as partecipeschan regularmaing a quist'occurrnza e lapro daja diversas personas chi han tut part bod a tuot quistas spassegiadas.» Cla Rauch es eir guida da cumün e quinta tanter oter eir da quista occurrnza sportiva. Uschè s'ha üna gruppa directamaing annunzchada pella Traversada da quist on.

Ingün trenamaint special

Cla Rauch d'eira d'ün 43 ons magister a Sent. El es creschü sü a Vnà ed ha frequentà il seminari da magister a Cuoira. Avant co far il stüdi da magister secundar a Turich ha'l dat d'ün duos ons scuola a Sent. In seis temp liber s'ingascha'l eir hoz amo adüna per la cultura. «E scha la

sandà permetta suna blier in muntogna, saja quai d'inviern o d'instà.» El es quella persuna chi administrescha ed actualisescha la pagina d'internet «sent-online». Plünavant ha redigi Cla Rauch il cudeschin da festa pels 100 ons da las Gallarias d'Uina e fa part da la gruppa «A Sent be rumantsch». Pel giubileum da la 15avla ediziun da la Traversada da Sent ha'l realisà il cudeschin da festa e ramassà fotografias, datas e descrit tuot las singulas etappas. Tenor el nu faja dabsögn da preparativs specialis per as partecipar a la Traversada da Sent. «Schi's va regularmaing a chaminar es quai fingia avuonda trenamaint. Important esa d'avair bunas s-charpas e chi s'es eir fingia adüsa cun quellas», manzunà'l. Plünavant racumonda'l da tour cun sai plü pac pussibel: Avuonda da baiver, effets persunals e forsa alch per as müdar. «Per esser sgür chi's riva amo a temp illa Chamonna Sesvenna as stoja esser passà il plü tard a las quatter davomezdi il post d'Uina Dadaint», es ün ulteriur ed ultim cussagl da Cla Rauch.



Cla Rauch da Sent es ün dals iniziants da la Traversada da Sent.

Üna gruppa in viadi tanter Fenga e la Chamonna Sesvenna.

FOTOS A. FILLI/MAD

